

Wárágà Pólò dré tisìle Tèsàlòníkèbhá ì dré dhi ni àlo

Wárágà kònìdhi ni tà àndu ngìle drìdrì dhi

Kònìdhi wárágà Pólò dré tisìle móndyá ka'ìbhá Tèsàlòníkè na dhi ì dré dhi ni àlo 'i. Tèsàlòníkè nda tá bhàandre kàdrì Rómà ki òpì ni bvò Màkèdòníyà àdhya drìle dhi 'i. Pólò tsa tá Rúbí Tani longó gò Èkèlézyà bhàzo kònàle, dré tá adrérà'a áyi atsí andre ni rì to dhi 'á, akódhi ni pfòma Fìlipóyì lésè dhi àmvolésè. Di, gí tá rè ko, Yúdà ànzi ì dré togó kònzi bhàzo Pólò rú, adrézó ligìlé ába. Di adré tá leá dhi, Pólò kòpfò Tèsàlòníkè lésè lile Bèróyà na (Tà 'òle dhi ì 17:1-10). Amvolásà, akódhi kòtsa Kòrìtò na dre dhi, dré móndyá ka'ìbhá Tèsàlòníkè na dhi ki rúbí yìzo áyi àziàmú Tìmòtéyò tí gò, dré wárágà kònìdhi ni tisìzo àyi dré.

Pólò adré wárágà kònìdhi ni tisì kitswázó móndyá nda ki timbà àyi ki tà ka'ìka'ì na dhi bvò. Adré àwoyà ta Gìká dré àyi ki tà ka'ìka'ì ni tà sè, ìndì àyi ki lèle sè. Adré í 'o tá tà àyi kòfalé ngìni ya dhi ni tà 'o agalé àyi léna, adrézó àyi ki kodzó, ì kàdréro atsilé ngóro dré kitswálé Gìká mìlése dhi tìni. Adré kpà kúlí logó tà Tèsàlòníkèbhá ì dré tá lizìlé Mírì Yésu ni agòma ni tà dri, ìndì móndyá ka'ìbhá dhi ki ngàma dràdrà 'àsè dhi ni tà dri dhi ì sè. Kùdù ro dhi, adré Èkèlézyà ni drì

ta, adrézó tà kitswábhá ì kàdré 'oà àyi kòfalésè dhi ki tadhá àyi dré.

Tà kàdrìkàdrì wárágà kònìdhi léna dhi ki atìma

- 1) Mòdo fèma (1:1)
- 2) Tèsàlòníkèbhá ki tà ka'ìka'ì (1:2-3:13)
- 3) Atsima ngóro dré kitswálé Gìká mìlésè dhi tìni dhi (4:1-12)
- 4) Yésu nì agòma, ìndì mónnyá ka'ìbhá dhi ki ngàma dràdrà 'ásè dhi (4:13-5:11)
- 5) Mónnyá ka'ìbhá dhi ki drì tàma (5:12-28)

Mòdo fèma

¹ Ma, Pólò, túmání Sílà íbe ìndì Tìmòtéyò be dhi i, mà adré wárágà kònìdhi nì tìsì Èkèlézyà Tèsàlòníkè na dhi dré, àmi adrèbhá Gìká Atá àdhyà ró ìndì Mírì Yésu Krísto àdhyà ró dhi i dré.* Gìká kòbhà áyi togó tani àmi rú, ìndì kòfè tà kìdrìkìdri àmi dré!

Pólò fè àwoyà Tèsàlòníkèbhá ki tà ka'ìka'ì nì tà sè

² Lókyá mà dré adrérà'a tà zi Gìká tí dhi 'á dhi, mà adré ngbú adrélé àwoyà ta akódhi dré àmi títí dhi ki tà sè, adrézó tà zi akódhi tí àmi dré.
³ Vésè wáyi, mà adré àmi ki tà kònì ki kisù Gìká àma ki Atá kandrà kòdhyà: Mì adré àzì 'o àmi ki tà ka'ìka'ì sè, adrézó tà 'o àmi ki lèle sè, adrézó mì bha àma ki Mírì Yésu Krísto véna landè àko ró.

* **1:1** 1:1 Gìká nì Kúlì tìsile Gírìkì ti sè dhi léna dhi, à adré rú «Silùwánò» kisú kònwa. Rú nda tá rú àzya Sílà dré dhi 'i.

⁴ Ama ki adrúpi Giká dré lèlè tò ni i, mà nǐ tàlè dhi, akódhi zì àmi adrélé mónnyá ina i ró dhi be. ⁵ Tàko ko, lókyá mà dré Rúbí Tani longózó àmi dré dhi sè dhi, mà longó tá Rúbí Tani nda ngbà 'í kúlí sè ko. Be ró dhi, mà longó àmakya Rúbí nda rinyí sè, Tirí Lólo sè, ìndì mà dré tá nǐlè, tà mà dré tá adrélé longólé nda i tà bàti 'i dhi be dhi sè. Mà dré tá adrérà'a àmi kòfalé dhi 'á dhi, mì nǐ mà 'o tá tà àmi ki tà sè ngíni ya dhi be. ⁶ Ami ró dhi, mì lebè tá àma, adrézó tà 'o àmakya tǐni ìndì Mírì Yésu àdhya tǐni. Tágba mì dré tá adrézó kizà nya lavúlé dhi, mì ka'í tá kúlí mà dré longólé nda arí Tirí Lólo dré fèlè gàlè àmi léna dhi sè. ⁷ Àsà dhi, mónnyá ka'ibhá títí bvò Màkèdóniyà àdhya na ìndì Akáyà àdhya na dhi ì nò Mírì ni tà àmi rú gò, ì dré kpà adrézó tà 'o àmikya tǐni. ⁸ Tàko ko, àmi ki tà sè dhi, Mírì 'o áyi kúlí la'úlé ngbà 'í Màkèdóniyà 'àsè, ìndì Akáyà 'àsè ko. Mónnyá àrà títí i 'àsè dhi ì yi tàlè dhi, mì ka'í Giká ngíni ya dhi 'í. Àsà dhi, lè mà kògò adrélé àmi ki tà títí àyi dré ko. ⁹ Angyá ko, àyi ki tǎndi ì adrè mì ka'í tá àma dòlè àmi véna togó dóro sè ngíni ya dhi ni tà títí àyi. Ì adrè kpà mì tayí gǐká tàko i, àmi ki togó adzázó Giká bàti lídrì ro dhi vélé, adrézó akódhi ni tà 'o màrábà ni i tǐni ngíni ya dhi ni tà títí. ¹⁰ Nyànomvá dhi, mì adrè akódhi ni Mvágó Yésu, dré tingálé dràdrà lésè dhi ni agòma bhù lésè dhi ni letè. Yésu nda apá àma Giká ni kombà adrélépi alìlè dhi lésè ni.

2

Azi Pólò dré 'òle Tèsàlònìkèbhá i kòfalé dhi

¹ Ama ki adrúpi i, àmi ki tàndi m̀ nì t̀lè dhi, àma ki tsàma àm̀ véna dhi tá t̀ t̀ko 'i ko dhi be. ² Ngóro m̀ dré nìle be dhi t̀ni dhi, dr̀dr̀ m̀ dré tsàzo àmi véna dhi kandrà dhi, à pfo tá àma ki m̀, àma ki 'òzo kònzì lavúlé Fìlipóyì na. Di, G̀ká dré tawà afèzo àma dré l̀zo áyì Rúbì Tani longó àmi dré tirì àko, t̀gba à dré tá adrézó ligílè àma ìbe t̀ tàndi ró dhi. ³ T̀ko ko, m̀ dré adrérà'a m̀ndí ki kodzó Rúbì Tani nda ni ka'ì dhi 'á dhi, m̀ adré àyì ki kodzó k̀nzò sè yà, t̀ kònzì m̀ dré lèlè 'òle dhi sè yà, kò ngalè túrúpfú sè yà dhi ko. ⁴ Be ró dhi, m̀ adré àmakya Rúbì Tani nda ni longó ngóro m̀ndí G̀ká dré ka'ìle gò, Rúbì nda ni bhàzo àyì drígá dhi i ró. Di m̀ adré longóá kitswázó m̀ndí ki togó 'o k̀nìlé dhi bvó ko. Be ró dhi, m̀ adré àmakya longóá kitswázó G̀ká adrélèpi àma ki togó tabh̀ dhi ni togó 'òzo k̀nìlé dhi bvó. ⁵ Lókyá m̀ dré tá adrérà'a àmi kòfalé dhi 'á dhi, m̀ t̀ tá t̀ àlo kúli k̀nì i sè kitswázó àmi ki t̀ bha kuru àngyá dhi ko. M̀ 'o tá kpà t̀ àlo àmi ki ngá kisúzó túrúpfú sè dhi ko, ngóro G̀ká ni tàndi dré nìle be dhi t̀ni. ⁶ M̀ ndà tá kpà rúku kisúlé m̀ndí i m̀lèsè ko, kàdré tá àmi m̀lèsè yà, kò ngalè m̀ndí àruka i m̀lèsè yà dhi. ⁷ Ama Yésu K̀risto ni àpòstolò ro dhi i, m̀ ni tá kitswá àma ki 'o adrélè m̀ndí kàdr̀ ro àmi dr̀le dhi bwà. Di, àma tá àmakya àmi kòfalé dhi togó ìbe ànzimvá kya t̀ni, ngóro ànzì ki andre dré adrélè áyì tàndi ni ànzimvá ki likí dhi t̀ni. ⁸ M̀ dré àmi ki lèlè t̀ dhi sè dhi, àma ki lovó tá ngbà 'í G̀ká ni Rúbì Tani longózó àmi dré dhi kòdhya

ko. Ama ki lovó tá kpà àma ki tàndi ki lídrì fèzo àmi dré, àma ki lèlè àmi véna nda sè.

⁹ Ama ki adrúpi i, mì kisù rè ngalè mà 'o tá àzí kòkóròko landèzo àmi kòfalé ngíni ya dhi ká. Mà dré tá adrérà'a Gìká ni Rúbí Tani longó àmi dré dhi 'á dhi, mà 'o tá àzí kítú be ìndì ngátsi be, àma ki tà kòlanzìró àmi ki àlo dri ko. ¹⁰ Àmi tà nda ki nobhá mǐ sè túmání Gìká be dhi i, mì ni kitswá tàá àma ki tà sè, ngalè mà 'o tá tà àmi Yésu ni ka'ibhá i kòfalé gyägya, togó lólo se, ìndì tà àko àma rú ngíni ya dhi. ¹¹ Mǐ nǐ kpà tàlè dhi, mà 'o tá tà àmi àlo àlo títi dhi i véna dóro, ngóro ànzì ki atá dré adrélé 'òlè áyi ànzì i dré dhi tíni dhi be. ¹² Mà timbà tá àmi àmi ki tà ka'ika'í na, àmi ki togó tindrìzo, àmi ki kodzózó, mì kàdréró atsilé ngóro dré kitswálé Gìká mìlèsè dhi tíni. Tàko ko, akódhi nda adré àmi ki zi fíle áyi Opì na, ìndì áyi mìlanzìlanzì na dhi nì.

¹³ Àsà dhi, mà adré kpà àwoyà ta Gìká dré tà kònìdhi sè: Lókyá mì dré Gìká ni kúlí yìzo àma tí dhi sè dhi, mì ka'í tá kúlí nda ngóro kúlí móndí kya ró ko. Be ró dhi, mì ka'í àmìkya kúlí nda ngóro kúlí Gìká àdhya ró, ngóro dré adrélé bàti dhi tíni. Dì nyànomvá dhi, kúlí nda adré tà 'o àmi adrèbhá ka'íá dhi i léna dhi nì.

¹⁴ Ama ki adrúpi i, àmi ki tà atsa ngóro Gìká ni Ekèlézyà Yùdáyà na adrèbhá Yésu Krísto na dhi kya tíni. Tàko ko, mì nya kizà àmi ki tàndi ki móndí i drígá, ngóro ì dré kizà nyàlè Yúdà ànzì i drígá dhi tíni. ¹⁵ Yúdà ànzì nda ì pfu tá Mírì Yésu dràlè ngóro ì dré tá pròfétà ki tupfulé todràlè dhi tíni gò, ì dré àma ki mǐ pfòzo tà tàndi ró dhi àyi.

Ayi ki tà kitswá Gĩká mĩlésè àlomvá ko. I adré ru pfu mónnyá títi dhi íbe. ¹⁶ I adré kpà àma ki le kikílé, mà kòlongóro Gĩká ni kúlí mónnyá súrú twá ro dhi i dré ko, ì kàdríró ko dhi bvó. Ásà dhi, ì adré àyi ki tàkonzì ki 'o gàle àyi léna gagà. Di, kùdù ro dhi, Gĩká tadhá áyi kombà àyi dré dre.

Pólò lè gòle Tèsàlòníkèbhá ki no

¹⁷ Ama ki adrúpi i, lókyá mà dré ru lanzízó àmi íbe lókyá tsà sè dhi sè dhi, àma ki ru lanzíma nda tá ngbà 'í rúbhá na, togó na ko. Di àma ki togó tá àtsi ró àmi ki tà sè gò, mà dré láti ndàzo kitswázó gòle àmi ki no. ¹⁸ Vésè be bĩ, mà lè tá gòle àmi véna. Lavúlé dhi, ma, Pólò, má lè tá tò, di, Sàtánà kikí tá ína láti àma dré. ¹⁹ Tàko ko, àmi ki tàndi i tà mà dré adrézó mĩ bha ásà, adrézó kpà lenzélé ásà dhi 'i. Àmi kpà àma ki kúlá mà dré dra àma ki drĩ bhàzo ásà kuru àma ki Mírì Yésu kandrá, akódhi dré agòrà'a dhi 'i. ²⁰ Ayíya! Àmi móndí mà dré adrézó àma ki drĩ bha kuru, adrézó kpà lenzélé àyi sè dhi 'i.

3

¹ Di mà dré tá kitswálé gòle àmi ki nòma ko dhi ni mvo bwà ko dhi sè dhi, mà nò tá dóro ni, mà dré adrélé àma pátí Aténáyì na dhi. ² Di mà dré àma ki adrúpi Tímòtéyò ni mùzo àmi véna kitswálé àmi ki kodzó, ìndì àmi ki tímà àmi ki tà ka'ika'i na. Akódhi nda Gĩká ni àziàmù mà dré adrézó Kristo ni Rúbí Tani 'o ayílé túmánì akódhi be dhi 'i. ³ Mà adré lèá dhi, dhya àlo àmi kòfalé dhi kòtayí i kizà mà dré adrélé nyàle dhi

dré kizílé ko. Àmi ki tàndi m̀i n̄i tàle dhi, Gíkà tayí àma adrélé kizà làsú be kòǹni dhi ki nya dhi be. ⁴ Tàko ko, mà dré tá adrérà'a àmi íbe dhi 'á dhi, mà adré tá ngbú tàá dhi, à adré tá 'òle àma ki m̀i pfo. Di tà nda atsá kòǹni bàti, ngóro m̀i dré n̄ile be dhi t̄ni. ⁵ Àsà dhi, lókyá má dré kitswázó gòle àmi ki nòma ko dhi ni mvo bwà ko dhi sè dhi, má mù tá Tímòtèyò àmi véna, n̄izoá ngalè m̀i adré tròle àmi ki tà ka'íkà'í rú nḡini ya dhi. Má adré tá ngá ro, dhya adrélépi món̄dí ki tabh̄i lit̄ilé dhi ni dra àmi ki lit̄í gò, àzì mà dré tá 'òle àmi kòfalé dhi dré atsázó tà tàko ró dhi sè.

Rúbí Tímòtèyò dré longólé dhi tindr̀i Pólò ni togó

⁶ Di, nyànomvá dhi, Tímòtèyò agò àmi vélèsè, àmi ki tà ka'íkà'í ni rúbí dóro longó àma dré àmi ki lèle ni tà be dre. Akódhi tà àma dré dhi, m̀i adré ngbú adrélé àma ki tà kisù, adrézó lovó íbe àma ki nòzo, ngóro mà dré kpà adrélé lovó íbe àmi ki nòzo dhi t̄ni. ⁷ Di àma ki adrúpi i, àma ki togó andr̀i àmi ki tà ka'íkà'í ni tà sè dre, tágba mà dré adrézó kizà nya lavúlé dhi. ⁸ Nyànomvá dhi, àma ki lídr̀i agò dre, mà dré ȳile tàle dhi, m̀i adré àmi ki totó tātà Mír̀i Yésu na dhi sè. ⁹ Di mà n̄i, mà ni àwoyà ta Gíkà dré tà dré 'òle àmi dré dhi sè nḡini ya dhi ko. Tàko ko, àmi ki tà sè dhi, mà adré lenzélé àma ki Gíkà kandrá lavúlé. ¹⁰ Kítú be ind̀i ngátsi be dhi, mà adré akódhi ni ti lizí togó wáyi sè, kòtayíró àma gòle àmi ki no, mà kòkitswáró tà àmi ki pibhá àmi ki tà ka'íkà'í na dhi ki timbà be dhi bvó.

11 Dì Gìká àma kí Atá nì tándì, àma kí Mírì Yésu be dhì ì kònzì láti àma dré kitswázó lile àmi véna. 12 Mírì kò'o kpà àmi kí lèle gàle àmi léna gagà, mì kàdréro ru le àmi kòfalésè, adrézó kpà móndyá àruka tí tí dhì kí le, ngóro mà dré adrélé àmi kí le dhì tìni. 13 Kòtimbà kpà àmi kí togó, mì kàdréro lólo, ìndì tà àko àmi rú Gìká àma kí Atá kandrá, lókyá àma kí Mírì Yésu dré dra agòzo áyi móndyá lólo tí tí dhì íbe dhì tú. Kàdré kònìni!

4

Atsima ngóro dré kitswálé Gìká mìlèsè dhì tìni dhì

1 Kùdù ro dhì, àma kí adrúpi ì, mà adré àmi kí tí lizí, adrézó àmi kí kodzó Mírì Yésu nì rú sè: Ngóro mà dré tadhálé àmi dré dre dhì tìni dhì, mì kàdré atsilé ngóro dré kitswálé Gìká mìlèsè dhì tìni. Tà bàti ró dhì, mì adré atsilé làsú be kònìni. Dì nyànomvá dhì, mì kògò adrélé 'òà lizo ába drìdrì. 2 Tàko ko, mì nǐ tà mà dré lazilé àmi dri Mírì Yésu nì rú sè dhì ì be.

3 Gìká adré leá dhì, mì kàdré àmi kí fe adrélé lólo í dré. Mì kàdré dì àmi kí líkí ndòtò tà sè. 4 Lè àmi àlo àlo tí tí dhì ì, mì kònì adrélé àmi kí tándì kí rúbhá líkí dhì be, ngóro dré adrélé lólo Gìká mìlèsè dhì tìni, ìndì dré kitswálé lindrì sè dhì tìni.* 5 Mì kòtayí àmi adrélé rúbhá lovó bha àmi kòfalésè ngóro pàgánò Gìká nì nibhá ko dhì kya tìni ko. 6 Tà kòdhi sè dhì, lè dhya àlo àmi kòfalé dhì kò'o áyi adrúpi kònzì ko, ìndì

* 4:4 4:4 A kitswá kpà kúlí tisile Gíríkí tí sè kònì kí ladzá kònìni: «Lè àmi àlo àlo tí tí dhì ì, mì kònì tòkó mòle dhì be, ngóro...»

kòlití akódhi àlomvá ko. Angyá ko, Mírì ni tà ño móndyá tíí adrébhá tàkonzì làsú be kònìni dhi ki 'o dhi i dri, ngóro mà dré longólé àmi dri drìdrì dhi tíni. ⁷ Tàko ko, Giká azí àma adrélé ndòtò tà 'o dhi ko. Be ró dhi, azí ína àma adrélé lólo í dré. ⁸ Di àsà dhi, dhya ángùdhi adrélépi tà lazilé í dri kòdhi ni ga rè dhi, adré mómí ki kúlí ga kòdhya ko. Be ró dhi, adré ína Giká adrélépi áyi Tirí Lólo fe àmi dré dhi ni kúlí ga kòdhya.

⁹ Kàdré ru lèma ngóro adrúpi i tíni dhi ni tà sè dhi, lè mà kòtisì tà nda àmi dré wárágà sè ko. Tàko ko, Giká ni tàndi tadhá àmi adrélé ru le àmi kòfalésè dhi nì. ¹⁰ Tà bàti ró dhi, mì adré ru le àmi kòfalésè àmi ki adrúpi tíí Màkèdóniyà na dhi íbe. Di, àma ki adrúpi i, mà adré àmi ki kodzó, mì kògòro adrélé 'òá lizo ába drìdrì.

¹¹ Mì kàdré àmi ki fe adrélé tà kìdrìkìdri íbe àmi kòfalé, adrézó àmi ki tàndi ki tà no, adrézó kpà azí 'o àmi ki tàndi ki drígá sè, ngóro mà dré lazilé àmi dri dhi tíni. ¹² Mì kàdré 'òá kònìni dhi, àmi ki tà ni adré dóro mómíyá ka'ìbhá ko dhi i mílésè, ìndì mì kitswá adrélé ngá zi mómí i tí ko.

Yésu ni agòma, ìndì mómíyá ka'ìbhá dhi ki ngàma dràdrà 'àsè dhi

¹³ Ama ki adrúpi i, kàdré mómíyá dràbhá dre dhi ki tà sè dhi, mà lè mì kàdré tà nìma ko na ko, adrélé kpà kizà ro ngóro mómíyá tà mì bhàzo dhi àko dhi i tíni ko. ¹⁴ Tàko ko, mà ka'ì tàle dhi, Yésu drà gò, dré ngàzo dràdrà 'àsè dhi 'í. Di mà adré kpà ka'ìá tàle dhi, Giká ni mómíyá tíí Yésu ni ka'ìbhá gò ì dré todràzo dhi ki tingá dràdrà lésè, ngóro dré Yésu ni tingálé dràdrà lésè dhi

tíni. ¹⁵ Mà adré tà Mírì dré tadhálé àma dré dhi kì ta àmi dré kòdhya: Ama dra adrébhá dhu rè lídrì íbe kítú Mírì dré dra agòzo dhi tú dhi i, mà kitswá lile drìdrì móndyá dràbhá dre dhi i kandrána ko. ¹⁶ Tàko ko, à nì lúlúgyá ga, ángéló kì kàdrì dré kúlí yòzo gò, Giká nì gòká vòzo gò, Mírì nì tàndì dré asízó bhù lésè. Dì móndyá Krísto nì ka'ìbhá gò ì dré todràzo dhi ì dré ngàzo dràdrà 'àsè 'íká. ¹⁷ Amvolásà dhi, Giká dré àma dra adrébhá dhu rè lídrì íbe dhi kì tìngázó kìmólé àyi íbe ndùrùku na, àma títi mà kòkisúró ru Mírì be kurú na. Dì mà nì adré túmání Mírì be kóná vèsè kólyá. ¹⁸ Dì ásà dhi, mì kàdré ru kodzó àmi kòfalésè kúlí kòdhi ì sè.

5

Kitú Mírì Yésu dré dra agòzo dhi

¹ Ama kì adrúpi ì, kàdré lókyá kì tà sè kítú íbe dhi, lè mà kòtisì tà nda àmi dré wáràgà sè ko. ² Tàko ko, àmi kì tàndì mì nì dóro tàle dhi, kítú Mírì dré dra agòzo dhi nì atsá ngóro kùgú dré adrélé atsálé ngátsi sè dhi tíni dhi. ³ Lókyá móndí ì dré adrérà'a tàá dhi «Tà títi dhi ì kèdrìkèdrì, ìndì kírì!» dhi 'á dhi, tà dra àyi kì tà pfùlepi dhi nì atsá àyi rú ngbõ ró, ngóro mváaswa dré adrélé atsálé tòkó 'a be dhi rú ngbõ ró dhi tíni. Dì àyi kì àlo kitswá ìna lapalé tà nda sílèsè ko.

⁴ Dì, àmi, àma kì adrúpi ì, àmi àmìkya tìnímvá na ko, kítú nda kòkiró àmi kùgú àdhya tíni ko. ⁵ Tàko ko, àmi títi dhi ì ànzì ngádra àdhya 'i, ìndì ànzì kítú àdhya 'i. Ama ànzì tìnímvá àdhya 'i ko, ìndì ngátsi àdhya 'i ko. ⁶ Ásà dhi, mà kàdré

adrélé ayí na móndí àruka i tíni ko. Be ró dhi, mà kàdré àmakya tàmgà dri, adrélé àma ki tà kisùle dhi ki likí. ⁷ Angyá ko, móndyá adrèbhá ayí ko dhi ì adré ayí ko ngátsi sè. Móndyá adrèbhá wá tsi dhi ì adré kpà wá tsi ngátsi sè. ⁸ Dì, mà dré adrélé móndyá kítú àdhya 'i dhi sè dhi, lè mà kàdré àma ki tà kisùle dhi ki likí. Lè mà kàsó àma rú àma ki tà ka'ika'í léle be, ngóro aya asolé àma agá kitswázó àma ki likí dhi tíni. Mà kàsó kpà àma dri tà mà dré adrézó m̀ bha adrízó ásà dhi, ngóro kátabhúlà aya ró asolé àma dri dhi tíni. ⁹ Tàko ko, Gíkà z̀ àma kitswálé áyi kombà kisú kòdhya ko. Be ró dhi, z̀ àma kitswálé lídrì kóná vèsè kólyá dhi ni kisú àma ki Mírì Yésu Krísto sè kòdhya. ¹⁰ Krísto nda drà àma ki tà sè, kitswálé mà kàdré gba lídrì ro yà, kó ngalè mà kòdrà yà dhi, mà kàdréró lídrì íbe tùmáni akódhi be be dhi bvó. ¹¹ Dì ásà dhi, m̀ kàdré ru kodzó, adrélé kpà ru timbà àmi kòfalésè àmi ki tà ka'ika'í na, ngóro m̀ dré adrélé 'òle dhi tíni.

Tà tàle kùdù ro Tèsalòníkèbhá ki kodzóó dhi
i

¹² Ama ki adrúpi i, mà adré àmi ki ti lizí, m̀ kàdréró àmi ki drì kobhá Mírì ni àzì na dhi ki lindrì bha. Tàko ko, àyi nda ì adré àzì 'o landezo àmi kòfalé, adrézó kpà àmi ki kodzó. ¹³ M̀ kàdré àyi ki tà bha kuru léle na, àzì ì dré adrélé 'òle nda ni tà sè. M̀ kàdré kpà tà kàdrìkàdrì íbe àmi kòfalé.

¹⁴ Ama ki adrúpi i, mà adré àmi ki kodzó, m̀ kàdréró móndí tòbvo ró dhi ki bí se, adrézó móndí tiri ró dhi ki kodzó, adrézó kpà móndí

tà íbe yàya dhi ki ledé. Mì kàdré àmi ki togó vwàvwà tadhá mónnyá títi dhi i véna. ¹⁵ Mì kònò dóro, dhya àlo àmi kòfalé dhi kòlogóro tà kònzi tà kònzi 'òle í rú dhi tí ko. Be ró dhi, mì kàdré ngbú tà dóro nda 'òle àmi kòfalésè, ìndì mónnyá àruka títi dhi i véna.

¹⁶ Mì kàdré ngbú adréle lenzélé, ¹⁷ adrézó tà zi Gíká tí landè àko ró, ¹⁸ adrézó àwoyà ta akódhi dré tà títi i sè. Tàko ko, tà nda kòdhi i tà Gíká dré adréle lèle mì kò'o Yésu Krísto na dhi 'i.

¹⁹ Mì kòkidrà àtsí Tirí Lólo àdhyà ko. ²⁰ Mì kàyízè kpà tà móndí i dré adréle longolé pròfétà kya tíni dhi i ko. ²¹ Mì kàdré tà títi dhi ki tabhì, adrézó tròle tà dóro i rú. ²² Mì kàdré àmi ki líkí tà kònzi ki kára títi dhi ki tà sè.

²³ Nyànómvá dhi, Gíká adrélépi tà kàdríkàdrì fe dhi ni tàndì kò'o àmi atsálé lólo kitswálé títi í mlésè. Kàdré kpà àmi ki lídrì líkí wáyì, àmi ki togó íbe ìndì àmi ki rúbhá íbe, mì kàdréro tà àko àmi rú kítú àma ki Mírì Yésu Krísto dré dra agòzo dhi tú. ²⁴ Gíká adrélépi àmi ki azí dhi kitswá adréle ka'ìle togó wáyì sè, ìndì a ni tà nda ki 'o nì.

²⁵ Àma ki adrúpi i, mì kàdré kpà tà zi Gíká tí àma dré be.

²⁶ Mì kòfè mòdo àma ki adrúpi títi dhi i dré, adrézó ru kamú àmi kòfalésè àyi íbe lèle sè. ²⁷ Má adré àmi ki kodzó Mírì ni rú sè, mì kònàró wáràgà kònìdhi àma ki adrúpi títi dhi i dré.

²⁸ Àma ki Mírì Yésu Krísto ni togó tani kàdré àmi íbe!

BÚKÙ TÀ TÍDHÍ//RU YÌZO DHÌ ADHYA
Logoti (Logo): BÚKÙ TÀ TÍDHÍ//RU YÌZO DHÌ ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source files dated 29 Jan 2022

942af0a0-42ea-5477-8f1a-fed39823f32b